



UKA 2016/140

23. september 2016

Debora Kleist

Kalaallit Nunaanni pinerluttulerineq pillugu inatsisip aamma Kalaallit Nunaanni eqqartuussisarneq pillugu inatsisip allanngortinneqarnissaanut misingiummut Namminersorlutik Oqartussat tapersersuinissaat pillugu Inatsisartut aalajangiiffigisassaattut siunnersuut (Oqarasuaatikkut nalunaaruteqartarneq, kalaallit nunaanni pinerluuteqarsimasunut inissiisarfinni pissaanermik atuineq, kiisalu palleeqqusinnginneq, sumiiffimmeeqqusinninneq peersitaanerlu il.il.) aamma palleeqqusinnginneq, sumiiffimmeeqqusinninneq peersitaanerlu pilugit inatsisip Kalaallit Nunaannut atuutilernissaa pillugu peqqussut aamma pinerlunnernik eqqugaasimasunut naalagaaffimmit taartisiaqarnissaq pillugu inatsisip allanngortinneqarnera.

(Ilaqutariinnermut, Naligiissitaanermut, Isumaginninnermut Inatsisinillu atuutsitsinnermut Naalakkersuisoq)

Siullermik Inuit Ataqatigiinniit oqaatigiuartarparput persuttaasarneq akuersaanngilluinarlugu. Ajuusaarnatumi ullutsinni persuttaasarneq, inoqatinillu eqqisimatitsinnginneq takornartaanngillat. Taammattumillu akiorniarneqarneranut iliuuseqarfigineqarnissaanullu suliniuteqartuarnissaq pingaaruteqarluinnartutut isigaarput.

Taamaattumik siunnersuutip ilaatsigut peqqussummi inuup illersugaanerunissaanut suliniutit suli nukittorsarneqarnissaat nutarterniarneqarnissaalu anguniarneqartoq, pitsaanagerusumik sukumiisumillu qulakkeerneqarnissaa kissaatiginarpoq. Inuit Ataqatigiinniit isumaqarpugut taamaaliornikkut inuit perulluliorfigineqartut imaluunniit eqqisiviilliorfigineqartut illersorneqarunissaat anguniarneqarsinnaasoq.

Taamaatorli maluginngitsuunngilarput tusarniaanermi akissutigineqartuni oqariartuutigineqartut, aammalu eqqumaffissatut, unammillernarsinaasulu tikkuarneqarmata.

Eqqartuussiveqarneq eqqarsaatigalugu oqarasuaatikkut nalunaaruteqartalernerup atuutilerneratigut, eqqartuussivinni suliassat isumagineqarneri patajaallinerunissaanik Naalakkersuisut Inatsiseqarnermullu ministeriaqarfiup oqariartuutigaat, Inuit Ataqatigiit qularutiginnigilaat eqqartuussivinni sulinermi sunniuteqarsinnaanera.

Tusarniaanermi akissutit tunngavigalugit oqarasuaatsikkut nalunaarutiginnittarnerit nunatsinni atuutsinneqalernissaat taperserneqarpoq, taamaattorli malittarisassat periaasissallu naleqqusarneqarnissaat inassutigineqarluni.

Nunatsinni pinerluuteqarsimasunut inissiisarfinni pissaanermik atuineq pillugu inatsisissatut siunnersuumi qasilitsumik seqqarsaatit eqqornaveeqqutillu pinerluuteqarsimasunut inissiisarfinni atuisinnaaneq periarfissaalernissaat apeqqusernarpoq. Qasilitsumik seqqittaatit atorneqarnerat pissaanermik atorneqalernissaat? Nunatsinni qasilitsumik seqqittaatit atorneqalernissaa nunatsinnut tulluarterluni? Inini matoqqasuni qasilitsumik seqqittaat atorneqaruni ulorianaateqarsinnaanerluni? Kalaallit Nunaanni pinerluuteqarsimasunut inissiisarfinni pissaanermik atuisarneq pillugu tusarniaanermi akissutigineqartut aammattaq isummorsorput, taammaattumik inatsisissatut siunnersuutip ataatsimiitaliamik sukumiissumik eqqartorneqarnissaa pingaaruteqarluinnartutut isigaarput.

Taamaasillugu Inuit Ataqtigiinniit ataatsimiitaliamut susassaqtumut suliassanngortillugu innersuupparput.